

皇明兩朝疏抄

皇明兩朝跡抄卷之十二

國是類

去疑二專委任以杜神幾疏

張遠

竊惟 朝廷之政柄必有所寄天下之公議必有所歸然
必主政者秉直而不敢失司公議者補察而無所私則
朝廷無失政天下無遺議矣今之內閣政事所出之府也
六科十三道公議所歸之地也 陛下即位以來委任內
閣政由裁決可謂以腹心待宰執矣而權倖率多於曲全
形迹不無於規避是內閣之任未專而政事尚有缺也信
用科道事由建明可謂以耳目寄言官矣而空言徒盈於

章奏成效罕聞於行事是言官之任未至而公議尚有鬱
也臣以菲才謬膺言職受任以來日夜汲汲思有獻於

陛下重政本之任求聽言之實而未得其說涉歷累旬惶
惑無任豈謂復有先任給事中今降除州判官史道劾奏
太學士楊廷和不法繼而兵部尚書彭澤御史曹嘉給事
中于桂相次論列之事哉夫史道輩指劾廷和蓋諫官言
事本許風聞若可諉也至議侵內閣之權則倒持政柄臣
不知其何說彭澤糾劾史道是以議論大臣苟存體貌若
有見也至於徇言官之口則因噎廢食臣不知其何心臣
竊惟朝廷之政柄必有所寄不在臺閣則在宮闈不

在 宮闈則在近習臣請歷以前代治亂言之其政柄在
臺閣而亂者有幾在 宮闈在近習而治者有幾一一數
之則責成之地斷可識矣故臣曰今日內閣之任不專而
政事尚有缺也天下之公議必有所歸不在臺諫則在衣
冠不在衣冠則在草莽在臺諫而亂者有幾在衣冠在草
莽而治者有幾亦一一數之則委任之司從可決矣故臣
曰今日言官之任不至而公議尚有鬱也然此皆屢奏
綸音節經論列言官增氣而大臣心安煩復之論臣若可
但已也可已而不已不必言而必欲言之者何也蓋恐疑
二之未定而來讒言之口間隙之可乘而貽瀾倒之禍也

他日內閣之事或有與權要相涉者必曰內閣所行未必皆公道也觀前日楊廷和為史道輩所論事是也噫此說一行則政本失而私黨啓敢有以此說進于陛下之前者是欲離陛下之腹心奸邪害政之言所當亟黜者也他日言官之言或有與貴倖相礙者必曰言官所論未必皆公論也觀前日史道輩所論楊廷和事是也噫此端一開則聰明蔽而巧佞行敢有以此言進于陛下之側者是欲塗陛下之耳目便嬖醜正之論所當速遠者也臣伏觀宋史唐介論文彥博織奇錦以媚貴妃結堯佐以固私黨且曰彥博宜自省即有之不可隱彥博愧謝不已一

日張貴妃侍仁宗親見所為燈籠錦者妃曰彥博以

陛下眷妾故有此獻或以為彥博夫人遺妃彥博不知也夫以彥博夫人所為而遂以罪博則介言失實矣然仁宗終不以疑介而博迄以功名終臣伏惟陛下弘此之謨

則疑二自消奸言不至腹心耳目之司各得其職矣二者各得其職而天下不治萬務不舉美祥不應者臣未之前聞也臣竊見陛下慈勤嘉納有虛懷聽受之心懇欵備

極有至誠委託之意宵旰勤勞有勵精不怠之勇而臣猶進言於陛下者何也內閣大臣未嘗蒙召對之寵而

言官章奏罕獲承甲夜之視故也且夫古之任大臣者顧

問備至延見不時是以不惟疑議得決而抑且心志交孚至我祖宗列聖悉由茲道議機密則左右盡屏謀大政則晷漏率忘令猷鴻軌載在方策燦然可述所以開業之艱難致治之光美良有以也臣今伏見陛下凡有大事合與大臣商確者惟宣諭之旨屢聞而召見之使罕覩且政關慎重甚有家人所不可得聞同僚所不得與議者如此等事而欲展轉相託臣恐宣泄又未免失身之虞因循則浸成誤國之禍抑亦情志隔絕忱恂不孚陛下雖屢降溫旨示之以無疑命之以展布而終未免於扞格也且今之士大夫偶有交際非極稔熟或寄聲於友朋

或甲款於簡素建及相見尚
生疎必至握手交歡言咲
嗟嗟然後足以成莫逆之好
陛下體勢之尊威福之
重轉移之間利害隨異大臣
得屢奉面顏真見心素
而欲其慨然不疑直以身任
陛下之重臣恐其必不敢也
方今當陛下清明之初左右
謹戴盆之戒凡有宣諭舉
嘗聖心然中人之情狀難
設或積日累月巧蔓蠹滋
之後因緣傳奉以遂其已私
耗大臣以文其奸計問之
內閣則曰陛下之意也質之
將有蓄疑於終身而無由
一白於陛下之左右者上下
不交內外無攝為害又孰

有大於此哉夫以陛下之明臣固知必無是事但臣過
事而慮可也慮及而不言可乎伏願陛下自是以後凡
有大政大疑必面召內閣大臣從容講論更可明示惴
誠不遺肝膈如此則啓沃有資奸欺不生情志無間而大
臣得其任矣至于天下章奏自軍民切已之事以上及於
左右所請之私大臣辭避之疏言官彈劾之文補拾之論
天下水火盜賊災祥之報日不知幾欲以陛下一人之
耳目一人之精神而事加省覽事加體亮勢不及也然無
關於權倖無關於大臣者各有以存皆能承奉德意就
使容私十無一二惟關彈劾與補拾者則未免由曲徑以

竊縱假倖門而掩襲其之公道全廢私意橫行此大非所以昭中興之治也臣伏願陛下自是以後每日條天下之奏章軍民切已之事有經左右祈請之私有幾如此等項明著款數一一附合仍請每日常格批出聖旨各付有司其諫官彈劾補拾之旨必經聖覽必由聖斷必須聖批然後頒降則欺誣者自絕請托不行何者人必非其用而後有所為彈劾也言必乖其常而後有所謂補拾也執此二端則其餘章奏無不必一一省覽行之而當自不必勞宸嚴矣行之而不當則諫官將繼言之終何以遜陛下之明覽哉是陛下所親省覽者雖止一言

官之奏而天下微情由隱固已網絡無遺所謂執一實以御百虛身不勞而事畢舉之理也不然何以陛下之聖明雄斷近者諸大刑罰奏疏雖香而迄無見及正耶良由萬機無窮耳目有限陛下既見其始而不見其終左右或舉其細而遺其大是以雖甚悖禮悞國之事而卒蒙嫗煦姑息之恩良可惜也夫大臣未蒙面對臣方以腹心之任不專也而論者以為大重言官罕承俞旨臣方以耳目之司失職也而說者以為橫行嗚呼衣冠之士縉紳之流自相詆訐自相非議快一時之論而啟無窮之疑因一事之失而傷莫大之體有識之士孰不為時事仰屋

撫膺始之以竊嘆繼之以長太息繼之以哽咽流涕也哉
所賴聖明在上養和平之治斥偏激之論專委任責成
之心絕乘便伺釁翫訛交鬪之奸謂臣之言為陛下腹
心計也非為大臣作遊說也為陛下耳目計也非為言
職立門戶也則天下幸甚宗社幸甚

持公論破私黨以定國是疏

曹嘉

臣愚竊聞之大順之道大臣之法夫法者人君與天下共者也孰可以不法而獨貴之大臣大臣者近君秉政權以攝御庶官者也去君近則勢易逼秉權重則事易擅受御者衆則上之附者易以篤三者之形成然後大臣之強不可制君威弱而國法斁治亂安危之機轉瞬變矣此大順之道所以必言大臣之法也洪惟我太祖高皇帝創法制治度越百王酌古建官分列六部故敢言復設丞相者誅大小稱位內外絕跡故敢有上言大臣德政者誅政在朝廷權在 主上故敢有交結朋黨亂成法者各以其

罪誅大臣奉法各守其職司小臣盡忠或為之耳目互相
關紐迭為唇齒此我 聖祖立國命官之體防微杜奸之
深慮也故李善長胡惟庸非不皆勲舊大臣所嘗聯以姻
婭而托以心腹者也及惟庸以不法被誅而善良亦以黨
庇竟戮死夫豈少恩樂殘至是哉懲大臣之奸惡者法固
不得不盡也解縉以晚進書生階官不過七品所上封事
又率激烈詆忤萬非善長者之親之舊之深之久可比也
顧乃一切優容采用不加譴責是獎進直臣以散大臣之
黨廣開言路以收總攬之權又我 聖祖洞昭奇忠防禦
群邪之遠籌也恭惟 皇上嗣守洪基固當遠承 祖武

太奮乾剛以詘大臣之強以杜壅蔽之漸以成大順之道也但精勵之心雖切而輔導之事罔聞宵旰之計徒勤而獻替之誠孰進甚則招權納賄樹黨行私故其勢不得不逼且擅其附之者不得不衆且篤其受攝御者不得不重足而後立累息而後言矣是豈祖宗不設丞相之法其弊使然哉良以假師保之虛銜者陰據機密之權任票擬之大事者竊弄威福之柄積習慣便力不可回其弊自至此耳正德十六年間以及新政之後其神奸巨惡誤國欺君以獲罪于天地祖宗者百律千條臣愚不暇深論今止觀僉事史道劾奏大學士楊廷和不法事狀遂

得嚴旨切責下之禁獄及廷和具本自辯尚書彭澤符
奏附勢俱以蒙溫旨慰留褒獎至律身處家之際無不
該載是為大臣者真能擅威權以移主柄黨大臣者真
能取容悅以惑聖聽矣且澤既謂廷和古社稷臣不過
固宜眷任終始矣既謂史道論救陸完王瓊許泰等為朋
黨奸惡納賄玩法乞要嚴加考究矣既謂科道官不換大
體不徇公議聽舉奏黜退以示懲戒矣何再奏乃稱廷和
之可去可留史道之有罪無罪科道之會本文章一一簡
左聖心非收干預反覆變詐巧佞百端非矣哉我

太祖高皇帝之不相值也如其值之則上言德政交結朋

黨符同奏啓變亂 成法諸大罪安能追鉞斧之誅乎夫
罪至誅戮亦大矣澤獨敢為不顧者澤豈全愚哉知廷和
為內閣之長其同官掣票擬之權調停處置暗有機關外
廷不得盡知也是雖陛下聖明亦且被壘惑不能事事
盡防也不然正德中 聖齒尚幼至如廷和律身處家之
際及力沮護衛不附權奸不寫 威武大將軍勅書彩帳
等事 龍潛藩邸千里隔越 陛下何由而知之且著之
綸音重復申演必至數百言始已哉臣愚於是敢謂
陛下之不知而私庇阿護有為之矣且史道之救陸完等
也納賄與否臣餘不能逆料但在御史則范杲在都御

史則李承勛在南京六科給事中魯綸等或連章或單
本至稱保其必求之太過獨一史道之言獨一史道之
哉且法司天下之平也刑科者叅駁之要也 內閣者
擬之地也而巧言諫免暗邀人心又不可赦之罪人所共
知者也史道既犯此罪當時 旨意何不詰責刑部覆題
何不執奏該科出納何不叅駁 內閣代言票擬何不從
中發之如近日夷情手本違誤之類也大家好作饒人以
免連累忽思奸及已私遂盡設之以外道道誠不足惜也
祖宗之法度無乃乖 朝廷之聰明無乃墮蔽奸權朋黨
之徒無乃猖狂大肆不復知 忌憚乎書曰小人怨女

女則皇自敬德故語及宗社則天子改容事關廊廟則宰相待罪受言之道宜爾也縱使史道言盡謬妄廷和尤當引咎况辭多有指事或關人吏部何漫重叅以啓拿問之端彭澤何敢傍侵以售迎合之計廷和又何必假泣號之言感動主上以蓋其雄辯二十欺罔之過哉嗟夫大奸似忠大詐似信臣愚不意儲陸完上瓊等復接踵於聖明之朝矣正德年間劉綎錢寧江彬相繼用事凡以言觸忤者輒捏罵旨意令給卿衣衛寧送鎮撫司打問以苦之然後鍛鍊誣服吞聲以去彼時御史孟洋劾奏太學士梁儲斬貴亦受此苦謫教桂林此權奸之所為非聖世

之所宜有也廷和每事盡咨儲等所壞何至今日反襲其
故智以蹈覆轍之轍乎復曰禮義不愆何恤乎人之言道
與廷和既各奏辯在官而編脩葉桂章等又皆閑涉事內
兩詞備具衆口難私此寧何不先令數臣明白開奏有
無聞其挽止之情曾否其原題之本各另上陳取聽
宸斷仍將道與廷和奏辯事情通送法司勘實具奏道
果誣罔則罪在道廷和未不法則罪在廷和太祖典刑
具在昭如日星聖子神孫正宜恪守成憲安能庇奸以
損威移權以階亂乎如此則朋黨固結之根可以漸除大
臣倔強不可制之勢可以漸抑壅蔽之途開而大順之道

昭矣若猶縱其假 詔獄之威以箝制人口挾絲綸之便
以遮蓋已私竊恐伏闕叩閣者駢集而請劔以斷佞臣之
頭者至矣臣愚再觀今日之事權移群下政在多門稱頌
功德者皆贊伊霍之尊希圖富貴者兩好隴蜀之望彼方
陰排異己巧用私人翼張焰虐而其勢人不可撓也故寧
犯 天子莫侮權臣何也資望深者恐棄其垂成之功蹤
跡孤者妙施其規避之術人囚於獄我術於 朝人繼桎
梏我服錦綉詩曰有覲面目視人罔極廷和獨何心者曾
無毫髮之愧若痴狂者邪包容狂直所以激敢諫之忠優
禮舊臣所以全堂廉之體伏望 陛下速允廷和休致以

曲保其身家仍將史道薄示懲戒以少舒其憤懣公法既
行私情亦遂庶幾九卿六部近慕劉健謝遷韓文馬文昇
劉大夏之風六科十三道遠追薛瑄王竑鍾同林聰葉盛
之議而我 太祖不設丞相 太宗官卑易制之良法舊
意始復矣仍望 陛下戒大臣各安職守代言票擬者毋
招權以樹威承 旨覆奏者毋附權而趨利吏部陞遷叙
用毋行指使之私科道糾劾論諫毋巧避薰灼之勢其餘
部院諸司以及百執事俱毋觀望以求容奉承而結好上
下協恭內外同德然後 朝廷之威福不移耳目之聰明
不蔽大臣之專擅潛消臺諫之忠節顯著大順之道成而

天下之治可言矣仍望 陛下親覽此奏早賜施行俾臣
愚無受失言之禍以彰 聖明納諫行法之美則臣愚不
勝幸甚

明公論以消私黨疏

陳講一

竊見近日山東愈事道舉大學士楊廷和不法等情廷和奏辯方已而尚書彭澤繼有所言科道交章甫畢而御史曹嘉復有所論彭澤之疏一出人曰此大臣之黨大臣也曹嘉復之疏一出人曰此又小臣之黨小臣也道路喧騰聽者駭愕夫公論不明於天下而後朋黨之說起此國步之厲階縉紳之禍阱戕元氣而傷太和莫此為甚也豈聖世之所宜有而抑哉 宗社之福哉臣不暇遠論近考有宋天禧之黨以小人攻君子也慶曆之黨以君子攻小人也元祐之黨則以君子而攻君子矣夫號為君子而亦

至相攻是以不旋踵而有紹聖之禍覆轍既昭後車不戒
此何為也宋人有言曰是非不明則邪正互攻公論不立
則私情交起又曰小人欲空人之國者必進朋黨之說噫
其亦可畏也已况自 陛下踐祚以來納諫求賢勵精圖
治然旋乾轉坤功業雖顯於無前制治保邦根本猶疑於
未固權姦擅矣檻虎潛復噬之威冗員次矣死灰萌復燃
之焰去歲江南大水而天道變於上京師地震而地道變
於下盜賊橫亘於中原夷狄憑陵乎邊境此其何時哉大
小臣工正當蹇躬盡瘁協志同心以承 陛下之德以建
太平之基可也而可相忌相疑切齒忿忿倒戈自攻以快

一已之私哉臣聞君子之處小人必有其術而其應之也
常恐其疎彼方旁觀竊伺日夜以乘吾之隙吾大小相安
彼此戮力脩其本以勝之猶懼其有一朝之患也而顧胥
譖胥怨自貽其隙畏彼歡呼踴躍之氣而啓覲覲觀望之
心此何為哉譬諸泛舟風濤而舟子相仇舟中之人弗之
利而舟外之人所必喜然不知舟既不測招招舟子豈能
免乎私忿可快而天下之公論可畏也臣下不足惜而
祖宗之 杜稷可痛也臣又聞內閣者重地也 成祖文
皇帝設以是安定秩五品 仁宗以後隆以師保其任尤
重蓋 國初章疏日簡總覽在 朝廷其勢不得不輕後

世機務日繁而擬票付臣下其勢不能不重勢有可輕而
不必於重是以儒生堪視草之司勢有可重而或失之輕
是以通瑾恣專權之禍曉事者斷知其位不可一日而少
虛權不可一日而少假也臣曾嘉舉劾之後內閣大臣
乞休家居或稱疾不出閉閣二日擬票由中樞霜滋堅冰
之萌大阿授倒持之柄是徒知人言可避而不知大柄之
不可移徒知他日責有所歸而不知今日漸不可長也慮
變謹微奉公體國者固如是哉夫 朝廷者衆正之本原
是非之衡鑑伏望 陛下清心觀理虛已察言明治亂之
歸審邪正之辯大奮 乾斷主張公議 勅下大小臣工

陛下任使矣至於觀時察變以權輕重議功矜疑以昭
國是以為 朝廷惜大體為邊境防遠患固 聖明所獨
斷非法吏所得招狀外越擬者也夫今大同終事之期諸
鎮觀望之秋 陛下更始善後之一機也臣等若復畏避
當言而不言則臣等不忠於 陛下甚矣臣等固非為兵
事談也蓋成事而說孔子不與今事已既往業已告成言
之徒增 聖慮傷 國體耳又臣等之所不敢也所望
陛下防遠慮存 國體以圖善後策耳然非謂愚言之必
可行也惟 陛下赦其萬死幸矣竊惟折姦莫先于聲罪
誅賊莫大於正名名不正罪不彰則多殺之不足威厚宥

之不足勸夫謀殺謀叛之不辯則大義乖而國是隨之
臣等謹按律謀殺謀叛輕重較然懸矣所謂謀殺者或三
二人陰計詭旨擡衆所不及而致人於死尋即解散者也
必非謂聚衆至數十人操弓挾矢明刃呼噪自夜達旦以
與主將格鬪者也必非謂劫殺良善焚毀公廨逼竄撫臣
出奔親王久而不解者也特此非國家所習有固未
易言耳臣等讀言其悉假令三三人謀人於途潛殺之而
奪其資又數十人者明火揚刃強劫人殺人不知將坐以
謀殺人者律乎抑坐以強盜律乎事固當有辨矣况大同
之卒累倡叛亂再殺大臣拒城逆命非一朝一夕之故稔

惡積慮無君父久矣其於忿怒卒一時偶聚為亂者萬
萬不可同日語也况律謀殺止言指揮千百戶而不及大
臣總兵者豈其遺哉其微意蓋可識矣蓋大臣者天子
之所改容而禮者也總兵者朝廷之所推轂而遣者也
賈誼所謂是皆於主上為近者也燕堂之分誠不邇於
此矣此而可殺是不有朝廷也如是而罪之曰叛逆豈
不與明乎哉是故制律定罪不得與指揮千百戶同議將
重鎮撫以防漸也夫國家於鎮撫重其權任尊其位號
隆其禮數而士卒猶得執而殺之今既不能正法聲罪以
為鎮撫重至使輕殺者之罪以與殺指揮千百戶同議自

今以往鎮撫威體下同未屬士卒視之無大尊顯鎮撫少
不如意欲殺即殺其殺之常復輕於前矣雖鎮撫亦將自
視卑也日臨臨焉死生首領之慮又何暇為 國家嚴法
振武以飭邊防也哉此其為誤誠非細故也傳曰水溺而
人狎之故多死焉火烈而人憚之故少死焉茲固先王嚴
法重令使民易避難犯之意也先王豈樂為是重法哉且
聖人立法創例皆因時救敝止天下之亂者也今士卒殺
鎮撫亦皆見殺矣使律文果輕 陛下猶當乘時立例以
重其典以立天下之防今律有重條而故降示以輕與是
奪主將尊而導民易犯也非所以明威別等正名杜漸之

道也慮者以為不如此則無以為肆赦大同辭耳臣等以
為固不必然也夫殲渠魁釋脇從是陛下神武之意不
殺之仁與古之聖人寧失不經同一好生之心也即是以
昭示天下傳播來世豈不光明俊偉之甚又何必文借輕
典以惠姦慝曲援律義以貽後艱姑以成此辭哉徒使
陛下赦之不為罪啓奸雄易犯之路開鎮撫不自謀之端
貽邊境無窮已之禍臣等誠竊惜之臣等非為律例爭也
此義既明則國是王法肯此焉定後禍隱憂胥此焉寢
蓋東隅不可追將焉桑榆之救也臣愚等願陛下勅下
兵部及法司諸臣從長查議申明律例榜示各鎮使知大

同不盡之誅寔蒙 陛下不殺之仁嗣是敢有聚衆劫殺
撫鎮官者俱以謀叛已行論重則稱兵聲討輕則據法追
論又使天下人知 陛下義理之怒無復屢赦終宥之幸
庶幾有所嚴憚而不敢犯矣此固明法救時反重折萌之
道也惟 聖明裁鑒又看得黃綰叅樞侍郎劉源清賄
交通貪功憤事春秋必誅 國典難貸夫源清受 陛下
命為總制大臣與有兵戎之責不能相親機冗以嵩進止
老師費卒罔克成功使醜虜深入幾於危辱奉職無效罪
當萬死然聞八議之典功賢必議先王所以示厚廣仁也
往者宸濠謀逆源清為進賢令守孤城獨以忠義激威士

民嘗大書誓死報國及人生自古誰無死留取丹心照汗
青之句倡衆為死守復積新圍其私第約賊至則闔室自
焚偕死以報國有家人請棄城逃走者源清即捶死以徇
宸濠遣偽將將兵百餘人道進賢招源清源清大罵曰吾
豈從若反耶立斬費偽諭者宸濠卒亦不敢加兵進賢隣
邑聞風始皆有固守志今兵部尚書曹龍往以御史按江
西首上源清功狀謂其首挫宸濠之鋒而奪其氣使賊不
敢東窺湖東諸郡屹然為閩浙屏蔽者源清之功也夫死
生滅亡之際豈可以聲音笑貌為哉源清視古人特幸未
死耳使源清而死陛下萬一聞其事將不加而壯之乎

昨者九卿科道諸臣交剡論薦無弗上源清者皆有試於此也由是觀之源清固賢且有功矣即其事少不當尚當蒙八議之貸况今之罪猶或有可矜疑者臣等又按律所謂激變蓋言救民之官失於撫字激良民為變者也源清未用兵之前士卒亦既殺總兵驅撫臣誅良善迫親王出奔為變矣固不得以良民論也源清本奉陛下命將天威致王罰不得謂非法行事又明矣特其累失機宜措置乖方滋令其大耳此則源清之罪也陛下即以是重誅之匪惟天下服陛下之公明且知奉職不效者其責如此不懲警而勉舉職者非人情也又何辭之有若治軍

行旅紀律中令皆主將之責源清尚與郤永垂矣不和又
權倖任均不相令制妄殺之罪視永亦當少從末減若夫
貪功任事之變則心術隱微之際所未易以形迹觀者夫
縣令小吏也族滅大禍也源清為小吏能不愛族滅之禍
以報先帝今當聖明之朝為國家大臣受專閫之
委顧棄其平生以負聖主臣等誠竊疑之夫今中外文
武臣工以才能明辨議論文采出源清之上者信不少若
委身徇國忘家報主如進賢者非源清誠不可多與也
近南科諸臣連章會疏所以訟源清者大抵與臣等合非
臣等實天下公言也迺今欲與郤永同殺匪惟其心或不

死恐嗣後人臣不究顛末不自循省將懷疑畏不敢為天下出力任事矣即叛逆之徒亦必快心洩忿借口為資天下後世且將謂國家以大同之故殺一非死素忠義大臣豈曰小戾云矣哉夫源清罪誠可誅當不在叛逆者之上焉昇楊林親為叛逆矣猶得以後功請保全議陞拜源清獨不可以舊忠貸一死乎竊恐天下後世有辭矣伏望陛下念其前忠嘉其舊績憫憐其矜疑之迹特賜貸其死若其奉職不效之罪則請重加明罰以為人臣愼事之戒夫錄往忠以贖新愆不失為義不以疑罪殺大臣不失為仁愼事不舉職則必罪無有不失為斷如是其誰不免

思忠義死効馳驅以報陛下以避明典哉輕一人之
罪以伸天下心義之義固聖帝明王所以鼓舞臣節者
也惟聖明裁矜又看得黃綰蔡稱潘傲孫允中俱應叙
用夫潘傲職任巡撫寄切安危鎮城中外將士吏民休戚
寧動倣常誰委耶自今觀之亂階不杜何以示威見難不
援何以示智踰垣而避何以示體勅符俱亡何以示守
降志辱身伏隸叛卒何以示節觀募自全何以示忠冒切
祈叙何以示恥惶恐章疏為賊請貸何以示法夫陛下
以禮法庶恥待臣而倣等以此報塞陛下此而不罪方
來之臣以苟辱為上計以觀變為良圖養亂蓄殃以成

國難且使大義日乖臣節日斁誠非所以風示來世而教
不忠也 陛下天地為量倣等倘蒙 容覆得竄流為幸
已極猶將醜顏垢面玷蟻 朝紳叨迪簡之例哉臣愚願
陛下勅該部查照 先命仍罷倣等庶少存廉恥以激懦
頑若楚書屠余等之功賞則臣等前疏已具夫 國家全
盛之時大同一鎮之叛不能明法正罪使 朝廷誅賊討
亂之義伸於邊圉顧二三小臣得以口舌乘時為功
陛下不勝其好生之仁俯聽其言然天下猶未能測淵
衷之注也若遂以為奇勲顯績溫賢駿拜張皇誇詡天下
後世將謂 朝廷為何夫賞不世功匪惟人不忠勸且

國體輕重隨之以臣愚論之崇身陷賊中本無疆土
之齊焚書奉使築濠非有軍旅之事乃肯越職以謀因樂
成事且其膽能入圍口足說賊陛下錄此而稍加賞異
之亦可以為人臣出疆奔走居難而回敢於趨事者之勸
矣若曰大同之功非此二臣者吳可為莫可就也竊恐天
下有以窺朝廷矣將謂朝廷過視大同為勅強不可
制故招降餌伏者遂侈為奇勲賜上賞甚非所以示威
崇体尊朝廷也故臣等為楚夏詹崇不宜厚賞者非為
國家吝惜誠愛体也無已則必歲月二臣資叙當遷吏
部別擇選秩加常叙一二等循陟陞足示優異則体全

勞叙而存不廢若夫樊繼祖挫威於城下張瓚受命于軍中亦復貪天因人冒昧掠美又非臣等之所知也夫如是則賞罰畢協而大義明規模宏遠而國體尊茲軌潛折而邊圉戢近可以示天下遠可以昭來世矣惟臣等前議與勘事大臣微有異同然非臣等以欲與綰異也亦非綰之見不及此也蓋法臣之体貴於公明朝廷之法貴於弘遠固各有攸當也臣等言官所公著朝廷之體耳况國家善後之策邊鎮久安之旨追監覆轍議在今日必智愚并陳葑菲悉達廣延博議然後聖擇有基也臣等若內避異同之嫌外惧群小之非緘默不語仰負兼收則不

忠之罪死且無贖又臣之所大畏也且天下之事非一家
私議要於是而已臣等言而是則適足為綰助亦大臣聚
衆思廣忠益之道異也迺所以為同如其非是足亂國
紀則聖明在上衆論在廷是非公私無所遁飾臣等
藁席闕下以候明誅再惟臣等俱遠方賤愚歷歷郡
縣謖蒙拔擢待罪言官數進踈狂過承溫允感激知
遇萬死思酬顧志慮庸懦故事每過憂誓死稱塞故言多
忤衆觸犯時忌固知所死亦惟仰恃聖明耳伏乞
矜其愚而察其無他臣不勝恐懼顛望之至

採輿議以定大計彌遠惠臨

曾林八

近該都察院左都御史王廷相題稱南京外守備事權
太重積威所劫愚民死心承順武臣恣肆虐楚平民被殺
無敢訟冤又稱留都遠隔江淮將臣權重人畏可謂寒心
乞要查照永樂正統年間例更用等因荷蒙 采納下公
卿群臣集議隨該兵部尚書王憲會同武定侯郭勛吏部
尚書汪欽等議得守備權任亦實太重久任不易原非定
規守備魏國公徐鵬舉合行乞自陳嗣後公侯伯賢者一
體推代則事權不偏重地方安乎矣 廷議既上衆且
喜且懼以此為 國家數十任所當議者先是臣工寡所

深慮今 聖哲英斷固相濟而成之幾也然又以鵬舉世緣勲蔭皆富無倫中外寵榮多所交識公侯勲戚半屬婚姻勢盛基固恐未易動搖既上奉 俞旨衆廼加額嘆曰真大哉 聖人也圖永燭微音冀垂裕固 宗社生民無疆之休也及鵬舉自陳兵部議題奉 聖旨徐鵬舉不准辭還着照舊管事欽此群下廼相驚愕竊惟諸臣忠謀非一人私議 陛下業已久知廼今忽異 前旨 聖謨淵深固非臣等所能測識然其議也臣忭切陪末議竊見諸臣憂深慮遠之意似有未盡徹于 聰睿者敢繹陳其議惟 陛下赦其萬死而垂 聽焉竊聞談徙新之計於

火未及燃之時則主人徒駭而不見聽論危亂之禍於清
明全盛之朝則明主固疑而不蒙察何也變固未形而事
未易逆覩也然而忠臣哲士往往先事而陳憂柔亂而揆
策者誠知夫過微之力易而圖者之功難也漢文之際諸
侯王賓貢以時可謂治安矣賈生迺逆慮其強大難制請
分其地而損抑其權至於痛哭流涕文帝迂生之言而不
能用卒之七國並起幾危漢室迺知逆計先見雖聖哲有
遺明而鑒往知來則迂士有時曲中也惟聖明御極群
工効忠徐鵬舉以庸才叨靈寵微力重負將免過靡遑而
安敢有他志廷議所云固非慮鵬舉之有他亦非謂徐

氏不當與兵慮徐氏不當世世典兵耳昔周成王大封諸侯分土建國至厚也命之曰共夾衛王室萬葉子孫無相為不利至明也其所命功臣又皆大公周召之徒至忠也卒之諸侯強大竟以弱周此豈成王命建之初志亦豈呂召所望於後人者哉成王不能得於呂召之子孫而今欲厚望於徐氏之後亦難矣惟留都古江左建康金陵也長江天險昔人所勝三國五代世爭都焉故往昔豪傑圖形勝以得志於天下則必以金陵為意又況我皇祖開基創業根本之地哉此豈可以他姓世與之乎古者畿內之地天子自治之下置卿大夫佐焉畿外之地則以分封諸

侯留郡雖遠在東南非今日所都宗廟社稷宮闕百
官固具也是即王畿地矣廼今徐氏得世世典之陛下
雖非錫之士徐氏固隱若有幽巖民矣且奉命守土固
得假陛下之威福而誅賞之也彼民愚無知徒見威福
之柄徐氏世操之而其父祖子孫又世為徐氏隸是故虐
使之則畏附而不敢有辭惠恤之則感恩懷德牢結而不
解夫世兵之臣為衆所畏附與大得衆心者皆古人所忌
是故其仁其暴皆非國家之利也陛下世有天下徐
氏世典南畿兩都相望徐氏與陛下相世甚非所以明
黜遠僭尊君卑臣之道也且國家分建之制世祿而不

世其土世爵而不世其權是故親王得世食其地不得
職民而與兵功臣得典兵職民然更推迭用或朝拜而父
奪之不得歷世長任久而不易也是故臣無逆節而君無
判刑今徐氏世爵世祿與親王及諸功臣同而世世典
兵職民獨與親王及諸功臣異則徐氏固尊於親王
而重於諸功臣矣京師陛下所垂衣而親御之者也國
營兵柄諸功臣猶數易歲無得世任者留都遠在數千
里外廼使一姓世典之縱不有後憂亦非所以一制而同
軌也周之東郊猶今之南畿也東郊固周公君陳畢公相
繼保釐未聞世任周旦之子孫而不易也且國家初制

原非世任者稽之古與參之今制考之往昔安危治亂之
故則徐氏不當世任繼內政明矣且今議代徐氏任者非
他人即陛下勳臣其威重貴勢固與徐氏等而衆推公
舉猶可得才望賢臣為之孰與世任徐氏則雖有幼愚不
肖之嗣陛下不得而廢之矣此春秋所以重譏世卿而
深惡宋之世大夫也故臣以為世任徐氏有害而無利易
徐氏有利而無害陛下何疑而不亟易此惟國家禮
文制度大政懿典有乖先王之制非祖宗之舊者
陛下悉釐正而復之聖德與武固千載一遇不世之
主也惟徐氏世任之制異先王之典非祖宗之舊有莫

大之慮失尊上之體虧全安之福乖同軌之制今所當釐正者莫先焉此諸臣之所以乘時奮議深望於陛下者也夫群臣未以此言進則上下猶相安今此言聞矣

陛下縱推誠徐氏不免於疑畏積疑懷畏之臣容復可以典司兵事耶伏望聖明鑒往代之失策循先王之懿矩矱後世之過計復祖宗之初制採群臣之公議杜將來之隱憂特准徐鵬舉所辭解其兵柄仍勅兵部別推才威忠廉公侯大臣數員疏名上請陛下簡命而時更任之則一舉而衆善備且後患復遠於憂患宗社生民之計無大於此矣惟徐氏震聲勢視京師任事諸臣

不啻十倍南都士大夫雖心知之然無敢私議者况敢為
陛下公言乎夫為徐氏而忍負陛下非忠也故敢冒萬
死進愚說為伏惟聖明矜其狂而寬其死臣無任恐懼
顙望之至

敦國體共濟時艱疏

周怡

臣惟人臣事君無分崇卑無分內外皆以盡心體國為忠協力濟事為和舍已從人益無營序賢為公自古及今未有不由此而臻治理者也况卿輔大臣爭於朝撫總大臣爭於邊而求脩內治禦外侮萬萬無是理也近知內閣大學士翟鑾嚴嵩與吏部尚書許讚不和互相詆訐及查兵部先因大同總兵周尚文奏討錢糧馬匹題覆疏內知巡撫總兵不相協和近據督理糧餉右侍郎趙廷瑞之疏又知總兵張鳳周尚文與總制侍郎翟鵬及督餉侍郎趙廷瑞俱各不和人持已見各自為心此大不祥之事

誤國大禍目前立見臣請先論其理而後及其事易曰
天地感而萬物化生聖人感人心而天下和平傳曰陰陽
和而雨澤降其論兵則曰天時不如地利地利不如人和
和之時義大矣天地陰陽不能違也近驗之一身尤見親
切今夫心志寧靜則目之所視言亦聽焉足之所至手亦
從焉各從心所欲而効其職然或目視而耳不聽則見
聞不相為用手持而足不行則物位阻而事廢其於心志
所欲曷克由濟人君猶心志也內外群臣猶耳目手足也
人君苟知尊奉心志寧肯耳目相違手足相賊也故曰
同寅協恭和衷哉風教之大禮讓為先禮讓之行朝廷

大臣為首 朝廷者萬方之所宗仰大臣者群臣之所楷
模觀而效焉必其甚者 朝廷有違言之隙則讒譖之釁
長於人大臣有動色之爭則攻訐之禍流於下由今溯昔
未之或易也 皇上臨御以來二十三年於茲矣由初年
求治之銳以及今日憂民之切宜乎天地位而萬物育太
平有象而四夷來王也今 陛下日事禱祀而四方之水
旱災傷未能消也歲開納銀之例而府庫未能充也歲頒
蠲租之令而百姓未能蘇也時下選將練士之命而邊境
未能寧也此其故何也良由 陛下勞心焦慮于上而下
未有肯將命之臣也今何時也以內則財貨匱甚而百役

繁興以外則夷狄驕甚而九邊虛耗為輔臣者宜如丙魏
同心輔政房杜謀斷相資夙夜匪懈畏天命而悲人窮
凡可以利國家惠小民安邊徼者無不精思詳畫上以
啓君心下以勵群工可也夫何大學士翟鑾嚴嵩濫藉
寵靈崇已徇私播弄威福市恩脩怨聞二輔臣在內
閣有違言失色入見陛下各有私陳背詆是二臣已不
和矣何望其同寅協恭和衷以事上而風下也輔臣以
至九卿百執事位有崇卑均之為耳目手足聽命心志以
共成一身者也宜相濟而不可以相賊也輔臣真知人之
賢不肖宜明告吏部進之退之則人心攸服不宜挾勢徇

私以不可服人者屬之進退吏部宜有貞心直節如貞女
烈士使人望之知畏雖權貴不敢以非義相干不宜依阿
奉承一啓順端而後不可逆也今嚴嵩威靈氣焰凌逼百
司招權攬威使凡有陳乞疑畏罔不奔走其門先得其意
而後敢聞于 陛下中外之臣不計 陛下而惟知畏嵩
也翟鑾則依阿萎靡不能張王而氣勢之弱猶不足以驅
人之趨附名位之先亦足以為嵩之妨碍尚書許讚而世
三居吏部亦可謂世臣矣雖曰小心謹畏而直氣正色不
能預銷權位要求之心弱亦甚矣凡此皆 陛下所洞照
知臣言之非誣也詩曰有來雍雍至止肅肅相維辟公

天子穆穆此盛世氣象也今卿輔大臣陰擠陽排互相詆
訐以陛下為何如主當此之時不思培植元氣愛惜人
材共圖折衝禦侮之計而務修私怨果何心哉臣恐大臣
不和則儉邪細人乘間抵隙互相黨比媒孽啓釁非國
之福可懼之甚也往時論劾輔臣御史如謝瑜童漢臣相
繼假公事而罪謫之去矣其敏生喻時等亦已露于聲
色直言敢諫之臣於權貴雖不利於朝廷則大有利也
今皆假以公事奉有明命罪之謫之臣恐自是無言者
矣陛下之臣雖有如禱初驩誰復言之非國之福
可懼之甚也既經入秋宣大已報警息而文武總制大臣

各立門戶各持己見平時既漸離行格不相和協則必無
長馭遠駕之策臨敵掣兵按伏對壘將見甲可乙否彼是
此非正臣所謂目視而耳不聽手持而足不行其不誤事
敗謀臣不敢信也初設總制總督大臣欲其權力是以制
三軍之命如願指氣使可無不如意也今乃以相抗各自
為大而恥相下各自為是而恥相用是假之權位以相角
而非為衛國禦寇謀也大敵在前而文武構擧非國
之福可懼之甚也臣又見總督兩廣兵部尚書兼右都御
史蔡經舉劾方面守令官員臨內舉布按二司而劾一都指
揮僉事又以去任踰年踰月二知府劾以塞責其文劾武

苟且欺罔殊負朝廷簡命重臣撫綏遐方之心殊失鼓舞文武經畧地方之術今當致力中原宣威沙漠之日於忠勇將官宜折節優禮下之結其死心庶可得死力也使韓淮陰與蕭相國國士之知終於遁去岳武穆不有內制其擒兀朮強宋室當無難也今誠有韓岳之將寧肯低眉俛首受制于文墨刀筆之吏耶務須推赤心置人腹中明大義激其烈志有所異同明白曉諭不宜輒為裁抑以挫辱之為將臣者亦宜乘時立功奮勇先登以作三軍之倡不宜妄自尊大自取侮辱是而人和所結堅利踰金湯又何患黠虜不成禽耶臣又聞近日邊事內外掣肘文武

諸臣誠喜於被論而退信如是則上負朝廷推轂之心
下解三軍死綏之志庸懦不忠召虜人輕視之侮為國
大辱誤事非小也臣愚無知伏乞陛下大明離照赫施
乾斷無惑近論無忽遠圖戒輔臣毋務修怨以竊威福
戒吏部毋務依阿以輕黜陟戒撫臣毋辱將官以離士志
戒將官毋懷小忿以誤大事此皆目前緊要不可一日緩
者也更望陛下優容言官博采羣策虛心聽納先務和
德於上則大臣自爾公忠為國虛已忘讐各務和讓
于下群臣肅雍百姓泰和人和薰蒸神之聽之終和且平
區區外侮有不足攘矣此皆係於陛下建中和之極以

先之臣微小無知竊見時事大傷國體私切憤鬱恨力
不能排闥以號訴於宸前誠得天聽而見之施行
則亦可以報陛下祿養洪恩萬分之一即日賜死所甘
心也他日曖昧制于輔臣之手如謝瑜童漢臣輩陛下
能知之乎臣愚無任戰慄隕越之至惟聖明覆照
宗社幸甚天下幸甚

正人心定國是以保和平治體疏

汪文輝

臣本書生叨附甲榜觀政數月旋以親疾乞歸繼丁憂變任職歲餘復遇選改正當吏部都察院會考之日以定

國是一人心命題為述彼時舉其端末竟其說大臣不以臣為妄獲就御史之列臣自拜命二月於茲矣朝拜官而夕奏疏臣職也登對必先自盟臣心也顧臣欲以言報效區區芹曝之衷憤激於草莽者非一日矣况大計已畢正內外大小臣工維新之日乎臣將請陛下米嘉言新聖德以隆至治謹先舉立言大義前日條陳之未盡者而詳言之惟聖明裁擇焉一曰正人心戒觀望何謂觀

望蓋言官司封駁糾劾固將正 君心正 朝廷正百
官正萬民者焉有已之不正而可以正人者哉臣每追思
先帝晚年委任大臣皆夙德重望協恭同寅可謂衆賢
和於 朝矣始以一二言官見 廟堂議論稍殊猜疑一
生嫌隙遂起間有觀望之徒潛察低昂窺其所向而攻其
所忌且勢無常盛情亦隨之或服或叛態變無終朝乍賢
乍佞評更於月旦顛倒是非惑亂 聖德以致老成耆舊
進退不一而 國家大體傷損多矣其中又有鄉里故舊
意氣激成者要亦非大公之心也臣每見正人君子論事
理辯人物止釁塞弊義正辭嚴時有指斥聞者愧屈非中

無所為而大義足以服其心乎四載之間已往之失既在
於此將來之事可為永鑒使今日不知謹諸發慮之微而
踵其前弊因此日流日甚臣恐後之非今猶今之非昔况
傾陷成風消長迭勝邪正混淆忠詐莫辯人才之進退天
下之治亂關焉大臣欲為宗社大計者不深有可虞哉
昔宋元祐之事其始也以君子攻君子卒使小人投間排
衆正而陷禍亂此亦覆轍所當鑒也故朕在觀望非言官
第一義乎二義曰謹條陳戒紛更何謂紛更古人謂天下
有治人無治法我祖宗立法至為精密而卒有不行者
非法之弊也不得執法之人耳臣每見條陳或因噎廢食

欲改舊為新且處其非任則察之不精言非所職則語之不詳部臣恐重拂其情遷就題覆不知一法立一弊生及行之不通又思復舊非惟民無畫一之守即該部題覆亦不足矣如臣舊職驗試所與巡視共事者惟執繩引墨鎮之靜而內外竟自妥服固不必作聰明以亂之也查前此紛更之事見有以庫夫作弊改叅以行戶矣巡視有科又叅以工科矣至於本色折色更新復舊前後奏請尤為不一彼皆通達國體者豈不謂簡便而可循哉而其弊更深於前甚矣言之易而行之難也故臣舊有堂呈大要謂不可輕於變相宗重於違言官盤錯之地掣肘之

際在擇其任事之人而已即此一節其餘碎瑣迂濶之議
皆可例推此臣謂紛更所當戒也三曰謹糾刻戒苛刻何
謂苛刻臣謂論大事者論大體論大臣者論大節如果心
術傾險如賢嫉能行檢貪污招權納賄真有實跡衆所見
知正言以斥之可也若夫行本端良而才或疎淺心本質
直而氣或粗暴一疏其短彼將自恥求退不遑不必別為
指摘古之大臣有坐罷輒退者不曰罷輒而曰下官不職
有坐貪汙退者不曰貪汙而曰簞簋不飾無非所以養廉
恥存國體也今則檢其已往揣其未形陰私之影響言
語之疑似連篇累牘見之奏章以致彼此相詬前後相攻

如市井喧闐為衆嗤笑人已之間豈不兩有所失哉至於
方面重臣如果貪暴奸險貽害地方亟宜斥逐苟人品未
壞政體未乖則纖小疵瑕人皆有之而棄短取長不徒為
人才惜亦以為地方惜也蓋去之者以庸常繼之者不皆
卓異也況今日以人言而去明日以人言而用送往迎來
有司之趨走百姓之奔波已為不堪矣故夫揆其小疵指
為大疵又巧為形容極其醜詆務使當者不堪決於引去
以此求人天下能得幾全才以周 國家之用哉此臣謂
苛刻所當戒也四曰平意氣戒護短何謂護短如 人君
有愆言官繩之大臣有過言官正之至於言官之短所以

繩之正之者又何人也惟其無人是以天下有是非萬世
有褒貶其短愈不容掩欲自護不可也臣每見言官陳一
事論一人是非未當該部不與題覆氣便不平即同列明
知其非亦莫與爭甚者為之辭曰此衙門體面不可失也
夫臣子尚有不肯一字認錯何以感格 君父冀收 成
命於萬一哉臣望自今凡大體至計言官以公天下之心
言之至於題覆各部須斟酌停當是則曰是非則曰非大
臣以慮天下之心參之不必徇以套語久之事理既明人
情自定彼或懷憤於一時寧不愧服於他日哉此臣謂護
短所當戒也前此四事專責言官也然其要總在大臣鑒

前之失勿用將來希旨之人蓋妄希風旨之人退則忠貞
直諒之士遠忠貞直諒之士遠則道古今譽盛德者日至
於前大臣任已之光明正大獨斷於天下行事或有過差
之處孰從而聞之易曰夬履貞厲言賢者每傷於所恃也
况所謂妄希風旨者必乖巧人也焉有乖巧之人果可終
信而不吾叛乎又焉知不黨同伐異陰設機械以中傷善
類乎前日 國體既傷大臣自累者正以過信其言辯之
為不早耳若夫忠貞直諒之士雖識見有淺深其議論成
敗未必盡合意旨而精白之心終可寄托剴切之諫終可
深思况宰相之職不當以救時自足當以格心為本格心

之要祇在去繼遠佞使賢者得行所志而已此臣所以先
實言官而并責之大臣也至論處國事如家事進諫者
當別其緩急宜以外臣視內臣參奏者當辯其玉石之異
此蓋不專為言官而發今日不敢漫瀆天聰者嚴於自
治先清其進言之本耳臣竊觀今日聖朝氣象陛下
以寬仁神聖主治於上輔臣以公平明正輔治於下中外
人心爭自洗滌銓曹清矣各部大小臣工清矣撫按舉劾
多當郡縣貪汙者亦無容矣至於言路諸臣皆歷艱中外
清節誠百鍊矣臣之深憂過計者謂精明之治既少見效
渾厚之意不可不知細故可略也振刷太嚴及為多事之

擾中材可惜也按尋太過漸成刻薄之風讐隙可平也攻
訐太深必起胥戕之禍和平之治體日乖 國家之元氣
不免於剥喪矣故臣今首陳幾事大要亦欲事 陛下者
本之以忠誠發之以委曲處事者持之以剛斷而行之以
平安論人者主之以正直而濟之以寬恕使大小臣工相
推相讓同寅協恭以成和衷之治豈非 國家之福哉但
臣質本粗莽詞或激厲自以為是矣未知果中時弊合於
天下人之公是否仰冀 聖明赦臣躁妄俯加 裁決如
果臣言不謬伏乞 勅下吏部於進退言官之際更加詳
慎毋輕採毀譽中彼愛憎明據莖蕘考其心術務遠邪留

正以仰答 聖明責成之意更請 申飭中外俾深懲既
往為戒將來對案焚香靜夜覃奏此心此際孰監孰臨如
發於觀望則當制之以義如發於意氣則當平之以理去
偏誠而為正直去紛更而為安靜去苛刻而為寬恕去曲
護而為冲虛則已正而人無不正 國是自定和氣自集
消朋比之私回淳厚之俗大臣欲為莫安 宗社之至計
者亦可少舒矣臣瑣瑣千瀆不勝惶懼之至

用人類

辨忠邪以存國體疏

趙漢

臣切見近日言官以言獲罪奪俸調遣詰責其急人不自
安臣言官也非為言官惜也惜國之大體也惜朝廷
日漸多事而非治安之理也敢為陛下陳之自古忠與
邪孰益於國不待智者必曰忠於國者國之益也以今日
言之若何為忠必上為陛下保盛德下為海內憂民窮
為紀綱理其緒為法度嚴其守近裁權寵遠慮不虞就是
數者惓惓祈望而不但已焉是雖未敢曰忠亦學為忠臣
之萬分者也惟天忠與邪情相反而勢相勝邪之所欲忠

之所憎邪者利之患者病之觸目熱中心易憤而言易激
激則犯忌諱侵近幸而奸邪顧側目以圖之矣於是責之
以輕率妄言俸可奪也坐之以不諳事體官可遣也 旨
由中擬力能轉展欲加之罪何患無辭夫以內臣之私忿
而滅天下之公言戕天下之士類以遂內臣之怨報 陛
下以此輩為有益乎有害乎臣竊仰 陛下純粹之質保
有其性誠清明之氣不類於物誘忠邪之辨當如明鏡之
照妍媸無微不見柰此左右忍為欺蔽何哉臣言及此亦
知左右之臣能不巧為文飾之說以避怨報之嫌必謂
陛下明睿所臨誰容欺蔽必謂臣言亦妄也臣謂陛下

證其欺蔽豈徒容之惟夫不得而知之其為欺蔽也
深矣臣請 睿覽試詳近日言官章疏果為其家乎為其
身乎如其不為身家當以 陛下矣而被言近倖每有陳
奏必以快言官為辭則且言官以忠 陛下為心而近倖
者苦以言官為讎也讎私忌而不顧 朝廷愛過舉之名
其為心也果忠乎邪乎 固惜此忠邪之不明也忠邪不
明 國之大體見矣治忽之幾判於此矣且 陛下登極
之詔允 先朝以忠直詠諍及言事忤 旨死者葬祭廕
敘降調者編氓謫戍者或起復原職或酌量陞用而當時
中傷言官多出近倖則又顯戮遠竄冒不少貸此 新政

之美首開言路決藩壯輟為世道計切矣纔二三年者間
故輟仍循顛危罔戒謂之何哉語云君聖臣直孔子曰天
下有道危言危行今之言者過直與危所持 聖明在上
際天下有道之日云爾如中外以言為諱相率而為阿徇
為卑遜以避反中之禍其以 聖明為何如以世道為何
如豈不岌岌乎其殆也臣謂所當深惜者正謂此也而不
當自為言官惜也何也以言為責事有當諍諍而有感於
陛下有裨於治理雖殞軀碎首亦臣子之分也而况此
官此俸乎使無益於重而徒有以重 朝廷拒諫之愆臣
知蒙罪數臣之心方以不能積誠動 天向咎而遣奪非

其所惜也此臣所以重傷且類而無所惜焉者也然惟犬
馬之誠不能自已而因譴廢言非臣之職是以瀆陳愚悃
伏望 陛下采納 神一心之運用別群下之忠邪審言
跼之通塞係治道之隆替將必惕然懼景然悟其於左右
是非枉直進退與奪必公必明奸邪無所施其術而善類
亦得以遠其疑又何其間隙而為言者之指陳哉不然
國事日非將來之患非臣所得而測也

有言官以彰 聖德用將才以固根本疏 廖紀

臣惟君以納言為 聖臣以敢言為忠敢言之臣未必皆
當而納言之道在無不容蓋雖以勸忠直亦以廣聰明二
帝三王率致雍熙悠久之治皆此道也近者馬永論卹陸
完等事委是出位輕言 皇上不加罪譴但使之南京帶
俸閒住宥過之恩永固感激不淺矣而臣初聞 命竊自
深慶以為 睿智所發動涉精詳欲一掄揚以盡愚衷而
未敢也蓋南京 祖宗根本重地四方都會承平日久武
備廢弛臣以正德十六年任南京吏部尚書次年改南京
兵部尚書叅贊機務曾逐一點視軍政該行整理者不勝

驚愕玩愒之勢已至七八雖嘗竭愚據慮補救一二偶因
言官論劾旋以衰疾乞休遂歸衷情耿耿恒以負任為愧
臣雖身居田里而一飯未嘗不以南京為憂蓋南京有操
江營有內小營有外大營先年軍士大約十萬餘名迄今
逃亡事故僅可六萬餘名中間又多瘁弱不堪其精壯可
用者但可萬餘未經戰陣不識坐作攻刺之法一有驚急
難便驅使此兵之可憂者一也南京城墉周圍卡八十里
東西南三面猶有重門人烟輳輳獨北邊一面人烟稀少
多疏圃荒蕪之地守禦之備了無所恃此城之可憂者二
也平時操練并守門軍士所戴者木盔所執者木刀竹鎗

追原其故皆謂軍器悉貯內府該班軍官俱不敢領以
軍士每每逃亡并此器械不可追究恐累倍償夫以平昔
無事之時虛應故事習為輕便卒然有事之日戴此木盔
執此木刀竹鎗豈能禦變此軍器之可憂者三也三者不
獨臣憂之凡任南京有職者皆以為憂也三者既為可憂
而所恃者在將領耳南京坐府坐營自公侯伯都督指揮
以下中間曉暢軍士事固雖有人俱未曾經戰陣有警之
時欲其折衝禦侮難保必勝而將帥亦為可憂也臣近荷
召用至京退朝之餘每與已故尚書李鉞私相論及
南京可憂宜預擇練習戎務堪任將領者二三員奏請

用之坐營督率振起疲弱恢揚軍政平時之聲威可以懾
人心有事之謀勇可以成事功斯為保根本重地之至計
不可不急圖也臣之此言同朝三大臣亦皆聞之前月
楊銳 准告南京坐府臣心竊自私喜近日馬永獲南京
安置臣亦不勝私慶二將之去南京實 天啓聖聰有此
成命乃篤周祜之遠覽保根本之大猷誠 宗社無疆
之休也臣懼忤之餘欲俟 天威少霽具陳本末申薦揚
銳馬永寄以營務重其責成以彰 陛下不測之恩釋臣
昔者負任之愧言官一時未悟 聖意以馬永勇略素著
夷人畏服犯 顏申救如都給事中鄭自璧等言之御史

鄭洛書又言之 陛下皆不深究而御史魏有本愚昧奏
詞狂妄蒙調外任在 聖恩誠為薄罰在廷臣不勝悚懼
故都給事中鄭一貫御史許翔鳳等又交章論救臣以事
關 國體職在用人未嘗不咎有本之狂而深望 皇上
開容納之量先年給事中等官衛道等論及 世廟銜跡
雖蒙 聖恩謫外旋以科道交救俱 賜復職此見 皇
上明目達聰之所舍弘光大之量雖舜之舍已從人禹之
聞言則拜亦不是過 朝野傳頌至今不已今有本初試
言職事體未諳 雖煩瑣心本無他伏望 皇上恢天地
之量宥芻蕘之狂 俯從言官所請合無將有本仍復

原職惟復量加罰治則 陛下容諫之大度堯舜湯武不
得專美於前矣又望乞 將楊銳馬永俱俾南京坐營仍
照北京坐營體統行事則 陛下奠安 宗社之遠圖上
有以隆 聖祖根本之重地下有以貽後嗣無疆之丕基
矣臣待罪銓曹用人者臣之職用將者兵部之任今以吏
部而言用將之事出位之罪自知難逭但犬馬惓惓一念
愛 君之誠憂 國之心顧自有所不避也干冒 天威
仰祈 俯納臣不勝戰懼待罪之至

擴大忠以贊 聖治跡

霍朝

竊惟天下之治在人才人才振作在至公苟權有偏重人
競其私則忠賢沉廢下僚庸才倖登要秩賢否混淆甚非
所以贊 聖治熙鴻績也臣伏觀 陛下宵旰孜孜圖惟
治理十有四年于茲矣是宜百官有司無不競勸矣是宜
治政無不理矣乃今郡邑有司未見其慎職貽私未見其
改厲政治未見其振飭生民未見其安養怨氣鬱積感召
災變皆臣等不職不能奉揚至公之罪也臣恒謂天下不
治皆百官不職之罪也百官失職皆吏部之罪也臣未敢
備舉謹自推陞官員一事開具積年綱要為 聖明陳之

凡京堂有缺吏部不得擅推惟具員缺朝廷特旨陞用
考滿黜陟取自上裁吏部例不得考覈素牘具存可質
也自成化末年權歸內閣萬安劉吉等招權納賄言官攻
焉自後小京堂推陞遂屬吏部甚至兩京府尹光祿寺卿
太常寺卿京堂三品官也推陞亦屬吏部巡撫都御史至
要節重職也推陞惟會戶兵兩部吏部之權愈偏重矣權
所在人之易行私故自府尹及各寺卿凡蒙推陞即拜謝
於吏部之門語云受官公朝謝恩私室古今大戒各官
乃感恩吏部不知歸恩朝廷吏部權重之弊一也若大
理光祿各寺少卿順天大理寺丞惟吏部專權推舉故科

道部官欲陞小京堂只勿得罪吏部勿得罪內閣即可安
坐得之矣或暗托腹心於吏部或借吹噓於內閣小京堂
亦無不得之矣外任兩司知府雖有推陞卿丞之例地勢
孤遠得與其選者或鮮矣剛直雅正之士不肯抵首推門
輒縮細人恒奔趨以竊位所任非才真材不任吏部推重
之弊二也天下知府只有五十餘員知府之秩四品位不
為不尊所統專城地方千里責不為不重矣生民休戚皆
寄命焉權不為不要矣有缺推陞惟具一員 朝廷不能
裁其可否重權一付之吏部矣科道官有得罪吏部推陞
知府彼即緘口以去矣吏屬官有才宜內任或被讐謔即

陸遠方知府無所於憇矣百官惟知畏吏部不知畏

朝廷吏部權重之弊二也近承 聖諭自今巡撫員缺皆

會官推舉 聖上睿見洞察隱微矣自是撫臣知推舉之

公出諸輿論與奪實由 朝廷不專歸恩吏部矣惟光祿

太常太僕府尹卿丞之職吏部尚專權焉甚非所以昭大

公也夫卿丞美秩也况由是進焉六卿之長亦其選也可

勿重乎伏乞 聖斷著為定例凡兩京太常寺卿太僕寺

卿光祿寺卿秩皆三品者也遵照 聖上新定會舉巡撫

事例會九卿推舉吏部及自專焉兩京大理寺少卿寺丞

太常寺少卿太僕寺少卿兩京國子監祭酒司業兩京府

丞南京通政叅議皆清要職也合候四員其缺即會九卿
推舉内外才望官八員請旨擢用吏部勿得專焉於八
人之舉也六部大理寺科道官中舉四人焉惟求内外均
平使人無重内輕外之嫌也部屬與科道並舉使吏部司
官無專陞京職之私也僉事知府運使才德昭著皆陞京
堂使人知競勉守職毋疎遠自棄也必九卿僉舉絕吏部
握權過重之弊也必四缺乃會推從簡便也亦猶六科給
事中五缺以上乃一推補也否則人惡其屬已也謀沮焉
曰是煩數會也僕僕廢時也自是内外官員轉遷美職皆
知出諸輿論與奪實由朝廷不專歸恩吏部矣推陞知

府亦照推陞僉事例焉凡缺一員推資望二員請旨擢用推舉不當着再推焉有隱蔽不公言官糾正焉自是人知郡守之重思所以奮庸矣自是科道官推陞知府自知朝廷寵擢不怨曰權勢擠我矣自是吏部官不聽憑私報怨擠才望官於遠郡矣自是郡守得人與奪實由朝廷不專歸恩於吏部矣是天下之大公也惟貪權者甚不利焉吏部徇私者曰是焚更舊例實削我權不利一也小人油滑者曰我善鑽刺自今權要不能吹噓一人矣不利二也權要欲遂囑託自壓於輿論已私無所容矣不利三也吏部四司官不得顯陞京堂不利四也於治体有大利

爲吏部官不得市恩植黨傷 皇朝治化一也科道官
直已守道不畏吏部不畏內閣以背 朝廷二也六部屬
官才德昭著皆陞美秩外任官勞績昭著亦陞美秩蕩蕩
平平之治於 聖治有光焉三也人思供職紀綱自振

治化自淳四也斯議也臣久欲上 聞猶慮事体未諳不
敢輕率或召焚更之嫌乃今謬承 聖恩署掌部印推陞
各項官員日不可缺積年錮弊尚有悉宜條陳改革者俱
日力未及臣竊伏自念若因仍舊弊則吏部何以勵精百
官何以贊襄治化何以福澤天下何以仰体 聖心惓惓
圖治之美臣等曠職竊食何以逃罪乃謹略述推陞京堂

官府官而歛積弊伏惟 聖明詳察焉如可施行乞 賜
明旨行部著為定例永成式焉茲臣不便已私擅議改更
科道指實糾罪亦臣愚區區仰贊 聖治之萬一也

昧死陳言以效愚忠疏

楊名

臣以災異修省要有建白繼奉 聖旨令臣明言臣捧詞之餘不勝悚惧切念臣本庸劣無所知識荷蒙 皇上簡拔及第寵列詞林感仰 殊恩每懷圖報近見諸臣奉

詔陳言議論不一恐未足以上慰淵衷故以草茅之見騰為狂妄之說塵瀆 睿覽但臣涵養未至故氣乏和平問學未明故言多踈謬乃重煩 明旨臣驚悸隕越無地自容既而伏自思省所以有言實出于犬馬一念之誠非敢故為矯激以速譴責也以臣之愚時務人品固未能一一周知然得於見聞實不容已者况承嚴命之下苟復畏罪

隱默或支離遷就以求幸免豈不有負 皇上虛心納諫之仁也哉而臣願忠之初心亦自負矣故敢不避誅殛謹以所聞見出于臣民之公論者為 皇上明言之惟

皇上既許之復終察之臣愚萬幸 臣惟吏部諸曹之首

尚書百官之表而汪鉉者小人之尤者也往者吏部尚書有缺 皇上亦慎重大其人不肯輕予今乃屬任於鉉豈不以鉉為賢於諸臣耶然而 命下之日大小臣工罔不驚愕雖閭閻細民亦切切不已皆曰此地非鉉所宜處也蓋以鉉之為人心行反覆舉動乖張志惟務於逢迎心祇期於報復向總憲曹憲論劾今遷吏部又被群言臣恐

失今不處使在位日久以逢迎之巧濟其報復之私內
外臣工用舍盡謬則其為害可勝言哉此鉉之不當用也
如武定侯郭勛賦性姦回立心險詐阿奉權貴叨受

天恩蓋不必考其心術之然觀其氣象之著亦知其為險
人也 皇上使之久典戎務參代祀事及凡要緊朝政
皆得與議彼復不自檢飭肆意猖狂使為臣子者朝夕觀
效皆知助之為人豈得無可慮乎此助之不當用也如太
常寺者本司掌禮儀以事神祇祖宗導迎和氣光昭

國祚者也位列崇階稱為清要非心行純白資望深久者
不得與矣近者乃使陳道瀛金贊仁輩庸惡道流充任其

皇明司馬田才
卷二
三
秩臣每觀其聲音容貌即極粗鄙及聞其素行則飲酒食
肉貪財好色無所不至一遇祭祀則專意于分受品物及
香燭柴炭之類而已如此等人如此等心而望其誠敬精
白以贊助 皇上明禮之教有是理乎此道瀛壖不當用
也臣愚竊妄以為是數人者群心皆曰不當用也而

皇上用之豈亦 聖心之偏于喜者耶又如 皇上踐祚
以來在廷之臣條建議論之間識見偏執言詞紕繆以上
觸 天威自取罪戾者固非一人一事但據其迹雖若難
恕而究其心則皆可原自明示薄罰之餘懲創已久况皆
累朝作養才能文行各有可取其遺我 皇上共成光明

之治者也而可終忍于廢棄老死已乎鍾累有寬釋起用
為言者尚未蒙慨然允行近見大學士李時以愛惜人材
為請即荷加納中外臣民不勝欣躍此可以觀人心矣但
下該部已久未見覆題則臣所謂遲回觀望不能悉力將
順縱有陳焉不過虛文塞責之說豈可謂無哉臣愚竊妄
以為是得罪群心皆曰當矜宥也而皇上亦未能釋然
豈亦聖心之偏於怒者耶推而至于施為之間如稽復
舊典以備一代之制真盛舉也但未免工作屢興財力並
竭採運木植燒造磚瓦裝載灰石所至騷然民無寧日則
閭閻之下形諸愁歎以戾太和者亦豈少乎又如真人邵

元節者得以其術過蒙采聽於內府脩建醮事此雖
皇上祈天永命之心不能自己但禱祀之說自古無驗今
乃不惜糜費使之頻舉且命左右大臣奔走共事而元
節復率其徒侶持其播樂敢干大內闡揚法事遂至不肖
之臣妄為依託且間有昏夜乞哀出其門下者亦不能必
其無市恩博威實緣僨事之失也夫以皇上敬一之心
臣民祝頌之念感格天地萬壽之福百男之祥可以坐致
乃使其端小術懷以為功書之史冊以垂後世亦謂何哉
凡此或皆聖心少有所偏者故臣敢為內照自省及戒
謹恐懼之說蓋欲皇上遠稽堯舜所以德高群聖治冠

百王者不外此心之中和也使或一念之微一瞬之際及一事之末少有間斷即未純一即非中和是故慎獨之功確乎不可忽也乃臣之誠不足以感悟言無足以備採擷至聖明諭臣罪安可逃矣伏乞 聖明原臣顛望之至有臣狂顛之失將汪銑等早賜罷免得罪諸臣亦明勅下該部量為議處及大工完日加意休養無復有所興作以重困農民而禱祀之事一切遠却如此而民心有不嚮應天心有不潛孚者臣未之聞也臣疎遠賤士朦朧狂言干冒雷霆莫知死所惟 聖慈矜憫再賜垂察斯世幸甚斯民幸甚

數名實辨邪正以隆治道疏

毛愷

臣聞帝王之治莫先于用人而用人之道必明乎黜陟黜陟明則人心勵人心勵則庶官正庶官正則政務舉而至治成是以尚書稱述堯舜之治亦惟曰三載考績三考黜陟幽明庶績咸熙此誠治化之本致治之經也漢唐以來考績之法未嘗不具黜陟之典未嘗不嚴而得人熙績之効遠不逮古此其故何也蓋唐虞之所黜者四凶也皆天下之所謂不肖也所陟者九官十二牧也皆天下之所謂賢也漢唐之所黜者未必皆不肖而所陟者未必皆賢甚著名實混淆是非反易有以不肖為賢而反陟之者矣有

以賢為不肖而反黜之者矣是以黜陟雖同而治理不効也仰惟我皇上之德神聖皇冠前古敬天勤民惟日孳孳至於進退人才尤厯聖慮茲當京官考察之期正皇上靜攝致齋之日深惟治本灼見政機特勅禮部俾諭部院考察官員務要平允公當以俟黜陟一時臣工懽動中外皆謂皇上聖心之一王言之太真如天地之於萬物長養生成栽培傾覆無所不用其極雖堯舜之聖何以加諸一時當事大臣必能仰體聖心恪恭皇度以彰平日之典而唐虞熙績之盛可以復見於今日矣但近年以來清議不甚明公道不甚著人心不甚

正士習不甚端是非不易分名實不易考邪正不易辨苟
于黜陟之間一有不當其賢不肖之實則於 皇上平允
公當之盛心不無有負此臣區區杞人之見不能不慮也
臣不敢浮議泛說請悉指其名實之著而以往事證之且
如朝 觀年考察在外官員據有撫按潘臬歷年考語其
分遠其勢隔其情易公而難私然猶未盡得其當至於京
官考察止憑該衙門臨時訪采其分近其勢親其情易私
而難公是以賢否得實比之外官尤為不易據臣耳目所
見有行已端潔而不同於俗者有守法公謹而不諧於時
者有雅靜愿實而不善於承迎者有直介敢言而不容於

權貴者或反以為不肖而黜去之又有汙濫而外飾者貪
婪而巧避者奔競攀援而無恥者柔媚庸懦而無為者矯
情干譽而無實者或反以為賢而留用之此非賢不肖之
跡果為難知也職其所由蓋毀譽之言易惑而愛憎之情
易投或倡之於一人而和之者不厭其實或中之以一事
而聞之者遂以為真或假借當事之人務在中傷或致為
縱橫之論必於求勝或因鄉里親戚之故而互相造言或
有不可解救之勢或乘權要嫉妬之隙而巧為遊說必使
有不可申白之情或雇僱筆墨之徒或託名義或買囑吏
皂之輩媒孽誣言或投匿名之帖或通告訐之文或言其

行檢不脩而不言其果有何事廢墜或謂其貪矣而未嘗
指其以某事納某人之賄或謂其奔兢矣而未嘗指其得
某官出某人之門或加以惟薄曖昧之事而辱及於室家
或摘其細微疑似之迹而遂略其大節此賢者所以或負
不肖之跡而所黜者未必盡當也至于不肖者自知其不
為時論所與則又深為根蒂巧於弥縫或借譽於賢者之
口或倚勢於當路之門或以鄉里而固結或以姻婭而憑
依或託門生而出入求容或假故吏而徃來干謁或以鑽
刺而曲為夤緣或以黨與而自相援引或以詞章小技而
文其奸或以厚貌深情而掩其實或為異同反覆之論以

搖惑衆心或為陰險狡獪之計以挾持當道此不肖者所以得冒賢才之名而所留者未必盡當也如嘉靖十二年考察去留有如余胤緒等當事者初知其賢能竟以中傷而罷黜又如黎晨等當事者初擬退黜竟賴夤緣而倖免荷蒙 聖明洞燭微情 旁資輿論或收錄于既棄之餘或顯斥于苟容之後固足以激勵人才彰明 國法矣臣愚以為圖善于既事之後不若致慎于未事之前近日以米臣為外議以為多有浮薄仍踵故智旦夕奔馳彼此扇惑流謗生讒文非飾過無所不至一時傳聞皆以為善者未必留而不肖者未必去人情惶惑物議沸騰臣固知

聖明在上 天語叮嚀具條咸飭罔敢不恭必不至如往
日之弊竊悲流俗滋久積習難更薰一有如愚臣所慮外
議所傳者則於 平明治體不無有累臣官名監察職司
糾舉既有見聞宜不容默伏乞 皇上俯察微言 勅下
吏部都察院務秉公正之心痛鑒久積之弊考其素履不
惑於浮言按其實跡不眩於疑似其庸劣素著為衆所共
棄者雖盤據夤緣而必去正直有聞為衆所共與者雖媚
嫉妬害而必留名實不至於混淆是非不至於倒置萬一
見聞未真偶有虧漏人心所不服公論所不容聽臣等從
公舉論以明 國是以正公法則於 朝廷黜陟之與不

虛 皇上平允公堂之論無負而唐虞咸熙風動之化可
成矣

存君子退小人以裨 聖治疏

浦鉢

天下之治亂關乎君子小人進退之間君子進則治小人
進則亂此古今自然之勢也伏見 陛下於尚書林俊陶
琰俞允致仕而去於太監嚴文復用委任守備 溫青
一下人心惶怖皆謂嘉靖之治尤未及見正德之風又將
繼作聞太息者不獨臣一人也昔 先帝武宗初嗣帝業
惑於群小以致大臣若劉大夏韓文等不能安位行志而
去故十數年間劉瑾變於先寧彬振於後小人接踵糜亂
天下殘傷 國本有不可勝言者幸 陛下入繼大統首
以進君子退小人為天下急務於尚書林俊陶琰德望係

天下之公論才猷關天下之安危乃以禮起用君子可謂
進矣於太監秦文等為寧彬之逆黨椎銳之羽翼乃罷遣
閒住小人可謂退矣天下欣戴人心鼓舞皆謂太平之治
不數年間尚可復見邇者 陛下圖治之心漸不克終任
人之際頗乖物議罰俸貶斥既以權斥臣工樂用之意認
罪回話又以沮撓大臣發布之誠政干闕宦章疏累上而
不行事係貴戚觸犯一及而移怒是於君子始焉進進而
終不能用於小人始焉退退而終不能遠故猶得彌縫於
禁外以立廣緣之謀周旋於黨內以伸援引之術臣恐將
來進之者不獨一秦文也不能用則安位行志之機既與

心而相悖去 國懷鄉之志必因時以自高臣恐將來去
之者不獨一林俊陶致也陰長之漸陽消之萌於此可見
若林俊等今日可容其去則昔日不必起矣昔日所應起
則今日可容於輕去乎秦文等今日猶為可用則昔日不
必革矣昔日所應革則今日可容於復進乎臣所以惜其
去者非獨為一人也為天下之治也所以惡其進者非獨為
一人也為天下之亂也 陛下整紛未久廢蔭不遽進退
之間可無所庸心耶伏願 陛下惜林俊等老誠忠愛之
臣收回致仁 成命仍留辦事曉諭事中黃臣慎用奸邪
之奏革去秦文守備以抑奸黨自此之後親君子唯信任

大臣處以優容之禮以養其德望託以心膂之責以專其
任使委以施設之柄以發其器能不奪於群小之私以撓
其權不昵於貴親之恩以沮其志遠小人亟除奸惡追其
引用之自以發其奸重以法律之施以詳其禁究其要求
之類以破其黨守以剛明不惑於左右之言持以果斷不
撓於是非之口則小人無可乘之隙君子有樂用之志仍
將臣罷黜一以代林俊之去一以快秦文之心蓋臣之待
罪諫負其有已無臣不足為輕為重也庶幾 陛下取舍
之分明進退之機決而 朝廷之政可清 祖宗之業可
光繼述之孝不衰人心悅而天意順禎祥應而災異消太

平之治可復鑒於今日矣

廣至明大英斷以昭盛德疏

謝汝儀

臣聞人君之德莫大於明亦莫大於斷通者即報傳布海隅竊聞給事中衛道御史任養浩以言忤旨陛下尋用諫者之言復其官天下鼓舞翕然稱陛下之至明太監崔文罔上專權陛下其察奸即賜罷黜天下鼓舞翕然稱誦陛下之英斷雖古之聖帝明王從諫弗弗去讒弗疑與三代以下英君諷聞善如轉圜不為佞人所惑者何以過此真足以配休百王垂光萬代也臣又聞御史張袞因春時和欲陛下憲天行道乞將因議禮充軍為民降調諭德等官豐熙等量加放還錄用奉聖旨該

部者。來說中外欣然翹望再造之。恩既而奉。聖旨
曰。罷豈。聖心尚疑於孝道有妨。不無芥蒂於中邪。書曰。
后從諫則聖。中庸論舜之大孝。則曰德為聖人。蓋帝王盛
節莫過於此。尊親要道。惟斯為極。孝固在此。不在彼也。豐
熙等學識偏隘。不能上承。聖意。罪固狂愚也。陛下震
之以雷霆之威。放之謫之已足。示罰歷之以歲月之久。慮
之危之其悔已深。從而宥之。當有可觀。請者雖頻。未蒙
俞允。今日正。陛下寬悔恤之時也。何者。伏。闕諸臣。傷
于急迫。因箠物。故為類。頗多已非盛世之事矣。今死者不
可復生。生而存者。尚賴回春之舉。臣愚以為。陛下之聰

明仁恕諸臣之在竄逐者終當仰被休光但恐鬱鬱於行
伍卒徒之中依依於下寮編氓之內今歲無一人焉明歲
無一人焉歲月既深易損易失人才難得成就之難而廢
棄之易陛下他日縱憐而用之亦何及乎在諸臣萬死
固甘於陛下聖德不無有妨張公之言所當急從也臣
又聞御史喬棋極論內使谷大用不當取回康陵司香
欲陛下防微杜漸收回成命奉聖旨該衙門知道
中外駭愕廷臣追奪之命曰不見舉行豈左右者為
之先容聖心不無眷戀於中耶易曰履霜堅冰至始之
初六則曰羸豕孚蹢躅蓋履霜之微而知堅冰之漸因豕

之羸而逆蹄蹠之平皆喻君子之于小人貴防其漸也谷
大用之罪惡重大皆莫逃於天鑑不假臣言也登極
之初執而付之法司其足為曠此之舉而聖恩浩蕩竟
逭其誅已不足以洩神人之忿一旦無故從而用之禍機
所伏誠為不測今日正陛下當急防之時也何者往歲
起用王堂天壽山守備臣嘗執疏論之未蒙施行未幾
王堂且守備南京矣今去王堂守備歲月曾幾何時復有
谷大用之命臣愚以為陛下之聖神文武左右者欲
顯用姦惡固有所憚而不敢惟其錯刺黃緣甚秘而援引
招置甚巧今歲用一人焉明用人焉萬幾之煩豈

暇畢照一隨其計根據將日深威福將日移陛下他日
縱毅然去之不亦晚乎先帝已誤陛下豈宜再誤喬
棋之言所當亟行也夫日月惟至明故其照臨之所及
不以遠而弗及天地惟至健故時乎秋冬肅殺之氣斷
斷而不移伏望陛下不以遐遺推廣原復衛道丘菴浩
之心將充軍豐熙余甯等為民張漢卿郭楠等謫官呂枏
等慨然召還一体叙復寬免不以邇泄充大猷黜崔文之
斷將王堂一体黜退谷大用發回孝陵司香另選內臣
中謹厚者以充任使則陛下之至明與日月同照
陛下之美斷與天地同流不特前二事為天下鼓舞懽

忭俞然稱誦而已也臣過蒙任使遠在萬里犬馬微誠昧
死上千天聽不勝隕越竦懼之至

欽奉 聖諭

趙貞吉

伏覲吏部接出 聖諭朝覲在邇糾劾要公白朕即位以
來四年科道官一向放肆欺亂朝綱有奸邪不職卿等嚴
加考察仔細來說欽此蓋因御史葉夢熊奏論邊事言辭
躁妄上干 聖怒以致 聖諭臣聞之不勝驚懼臣切思
葉夢熊已蒙 皇上薄示降罰足以懲一戒百矣今又因
此一人遂波及于諸臣并及前四年之諸臣一時衆心洶
洶人人自危抱此私憂故不敢默也臣查得自 皇上登
極以來科道諸臣近二百人中間豈無赤心報 國忠直
敢言之士今一槩以放肆欺亂奸邪不職罪之其罪不容

于死矣臣恐考察之日所司承奉 德意過於嚴切未免
忠邪並黜玉石俱焚則將來言路壅塞士氣銷沮有傷
國家安靜和平之福其關係非小也恭惟 皇上聖德寬
仁如天如地臣民仰戴洋溢四海今有所激故降此 嚴
諭臣猥以疎庸謬承 委託當此衆心惶亂之時治忽將
分之際豈敢惜身保位結舌而不言哉臣嘗考往古漢唐
宋之事皆因納致黨人之罪遂令將一時賢才銷磨殆盡
致國空虛無以濟緩急之用而臨災以致于不救此誠可
為戒者我 祖宗之制設立科道許其聞風言事或是或
不是尚有執政諸臣酌量可否最自 上裁縱有不當亦

宜各受罰責以為懲戒而已未開群數百人而盡加考察
一網打盡以昭漢唐宋之獎者也伏望 皇上垂大造之
恩收回成諭特加 寬赦仍許科道諸臣洗心滌慮以圖
省改臣將見 聖諭之嚴既足以鎮狂躁之心而 聖恩
之寬又足以作忠直之氣 寬嚴並施 恩威相濟萬世
治安之道也臣待罪內閣一年之內屢被科道官妄加詆
毀不勝其辱是科道官本不知臣也臣今乃以此言以救
之豈敢有一毫徇私庇護市恩要譽之意哉 天地神明
實鑒此心緣臣一念朴忠實欲為 皇上尊顯聖名為
國家護養元氣為天下愛惜人才耳且臣兼掌都察院事

亦有考察諸臣之責與其調停營救于下孰若輸忠哀懇
于皇上之前倘蒙 聖明垂慈曲赦宥此無知之輩豈
不度越前代之美光 祖宗而垂令名于無窮也哉故敢
冒萬死為 皇上陳之伏乞 皇上俯鑒愚衷不即 加
誅戮臣無任激切懇祈隕越俟 命之至

憲綱考察御史疏

王廷相

臣等伏觀嘉靖六年八月內 皇上勅諭都察院有云正
統六年 英宗皇帝詔中外風憲係綱領之司須慎選識
量端弘才行老成任之其有不諳大體用心酷刻者並從
都察院堂上官考察降黜成化七年 憲宗皇帝欽准事
例巡按公差御史回京之日本院堂上官仍依舊例查勘
考察保結稱職者具奏照舊管事若有不稱奏請罷黜近
年比例雖存不聞劾罷一人蓋因堂上官不能振揚風紀
反為屬官所制避讒遠怨以致人心怠弛今後巡按滿日
務要嚴加訪察果無賊私過犯推奸避事等項實跡取具

該道結勘明白方許回道管事若有不職事蹟不許朦朧具奏照例奏請罷黜欽此欽遵臣等伏讀之餘仰見皇上慎重風紀之司必欲御史得人使德化宣流生民得所而後已真帝王之盛典萬世之所當守也臣查得御史出巡舊規除盤糧等差與給事中同行互相關防免其考察外其餘巡按巡鹽巡關巡茶清軍刷卷印馬等差一年滿日及事完回京各具行過事蹟御前復命仍備呈都察院考覈出巡有無贓犯及乖違等項違礙劄仰該道從公保堪委無違礙方許奏准照舊管事但御史出巡責任甚多今考察之例止言贓罰乖違未曾明具條件使御史無

所據守以之盡職本院無所憑藉以之覈實漫言指摘似
為未便臣等議得今後御史出巡回京考察除犯該賊犯
據有實跡照例奏請提問及過違限期照依舊定水程
查算外今將關係職守之大者六事定為出巡規格凡御
史有差備開載於劄付之內行令一一遵照條款考其修
否以別勤惰臣等另有訪察不在此限如此則御史目覩
耳聞之餘必能警省惕勵無怠職廢事之愆而朝廷之風
紀亦於是乎振揚矣臣等欲候命下咨行各巡撫都御
史劄行十三道并各巡按等項御史各一體欽遵施行
一除革奸弊御史之職方今天下官邪民玩甚矣錢糧

出納之侵欺驛傳往來之汎濫里甲困於無藝之供糧長
苦於應官之鎖巡監即販私鹽捕盜與盜通氣入官有見
面之錢管事有常例之賄假以公用而科歛任情指稱修
理而罰金無度吏典無賄而文書不行豪富通財而差役
得免隱奸蓄慝不可枚舉近年以來御史出巡惟務作威
作福以聳人之耳目不事廣諏博采以察下之隱微况巡
歷所在止二三日飄風驟雨一過不返若不用心體察民
間奸弊深隱何由以知合無今後御史出巡務要悉心廉
訪但有奸弊發露即當置之法理使按屬之地風清弊絕
以副 皇上救弊卹民之心回京之日仍將革除過各項

奸弊事由開造文冊呈院以憑考覈職業脩否

一伸寃理枉御史之職 切惟推情訊獄非上智之才公

平之心鮮有得其真者况權勢之家問官懾於利害富豪
之室賄賂靈於神明朴實之民鈍口奪於狡佞酷暴之官
殺人輕於草菅粗疎之吏才情拙於淑問由是情偽莫分
寃枉無愬小民不得其生者矣既不能體 皇上好生之
心且有以干上天至和之氣致災招眚莫不由此合無今
後御史出巡務要慎刑明獄及一應詞訟勘問之事虛心
推理緣情求實但有枉抑勿拘成案即與伸理使按屬之
地刑罰得理瞭無寃民回京之日仍將伸理過各項寃枉

事由開造文冊呈院以憑考察職業修否

一揚清激濁御史之職切惟御史為朝廷耳目出巡於外人才臧否賴以來訪部院考察憑之黜陟其關係至重也近年以來御史旌舉司府州縣等官不問其人品高下立心行事曾有早異政績與否但見其奉承齊備禮貌足恭便以為好即一槩濫舉多致數十餘人致使賢否同途薰蕕並器而不辨其所糾者類取一二塞責甚至糾及縣丞典史等官其大貪大奸蠹政而害民者則以鄉里同年親故之情掩蔽而不發惟念私情全不為國大壞風紀於斯為甚合無今後御史出巡於司府州縣官員務要即事

察政即政察心果見其人品高明心術正大政事卓異在
司府官斷可為公輔之臣者在州縣官斷可為科道郎署
之臣者方許薦舉其中人以下平常之才止可注在考語
不得混同高流以辱薦章其所糾劾首先貪酷殃民不法
之人次及罷輒無為老疾之重務要據其實跡奏行罷黜
不許挾私報怨以害賢善回京之日備將舉劾過各官賢
否實跡造冊呈院以憑考察若賢才者以不能奉承舍之
而不舉中才平常之人反夾雜一二以盡私情及大貪極
酷隱蔽而不劾者臣等體訪得出考以不職

一本院劄去巡按御史勘合公文皆關係地方重大事情

及官民冤苦奏詞有等公勤盡職御史督行二司及守巡
官員一一依期完報其有等漫無才志者則悠悠度日傳
食郡縣多致緊急事情廢閣不省又有等乖猾利巧及阿
私偏黨者每遇關係利害之事則推托閃避違留而不為
干礙御史糾劾不實者雖容易勘明而不報以致終年累
歲事無歸結此等御史尤為不職今後差去御史接管承
行凡先次御史勘合務要作急勘報其自己任內劄付者
除滿前兩個月持續差御史勘完其餘十個月內務要一
一勘明銷繳回道之日備將先差御史及自己任內勘合
開具已未完數目造冊呈院以憑考察其有遲夷等項事

情難於提人行勘者亦要明白開造

一監察御史出巡所以上宣德意下達民隱風四方貞百度此其大節也為御史者必其清修簡約鎮靜不擾庶足以安民格物以振揚風紀近年以來御史出巡在外動輒人馬千百擺列兵衛吹打響器以張大聲勢擅作威福又隨帶府縣能幹官員及校習驛丞十數不等以備任便導從如雲飲食若流全無清約之節反生騷擾之害所至州縣計其一日之費每至百數十兩本以安民而反以勞民欲振風紀而反壞風紀此等御史乃淺陋無識徒假聲勢於外以自大求其中未必有者也合無今後御史巡歷郡

邑務要安靜不擾本等導從皂隸之外並不許多用一人其府州縣驛丞等官亦不許隔境隨從迎候以為有司之害違者許巡撫按互相糾劾臣等察訪得實回道之官考以不職

一巡撫巡按兩相和協則能開誠布公以共成王事近年以來輒因小忿遂成嫌隙至相訐奏安望其同心戮力有益地方乎臣等嘗求其故皆巡按御史無禮不遜致之都御史正坐御史旁坐禮也近年以來御史每與都御史上下賓主坐矣都御史前班御史後班禮也近年以來御史每與都御史同班並列矣豈非執法者不法貞度者無度

乎巡撫柔和忍事者則隱忍而不與之較若遇剛毅正直者則必與之相講論不從則嫌隙成矣曰是巡撫所行者巡按則不行巡按所允者巡撫則不允官吏人等答應巡撫者巡按則惡之答應巡按者巡撫則惡之至有無罪拏問因而革去職役者撫按自相構隙而禍及平人豈不冤哉以斯人所行乘勢驕傲為患如此欲望一方政令之平民庶之安胡可得哉臣等以為春秋之義王人加於諸侯之上禮也巡按御史在三司則可在巡撫都御史則不可何也都御史列銜內臺奉勅巡撫一方非在外守土之臣可比也地方事情可以共議而名分體統則不可越近

日本院題 維都御史王坐御史隅坐臣等以為此只以私情非禮議處非所以論於朝廷之上也若據禮制名分御史仍當旁坐仍居後班為宜合無今後御史不論副都僉都其坐旁坐其班後列以正體統若有仍前不遜者臣等察訪得實回道之時考以不諳憲體奏請降調

皇明兩朝疏抄

類

揭官箴明士節以正始進疏

翁守禮

竊惟夫人之情靜則無欲聖賢之教懲於未發嘗見人為
諸生時莫不誦法聖賢講明道義冀得效用以樹勲名及
其出服官政矯然不變寒者固多乃輒動於利欲恣其性
情盡喪其平生者亦復不少何者勢分移人非有卓識定
見不能自立爾臣等今春謬以職掌得與大計群吏之治
見以貪酷不謹去者不勝嘆惜然已無及矣夫破甑既以
無顧而完璞所宜慎雕今科進士增額至四百人固以一

時濟事安民於四百人者攸賴也然鑒往並來切慮未必無一二復蹈不韙者昔人謂禮者禁于未然之前法者施于已然之後與其既敗而行法孰若方初以明禮提撕一悟則所全多矣今當諸士觀聽聿新之始臣等謹將官箴節槩舉切要者數事條上懇乞聖明俯鑒嚴命曉諭使其為候軺第一義將不至于迷途而失愈遠矣諸士幸甚官民幸甚 一端趨向昔人謂士品有三道德功名富貴是也顧人所志何如爾夫道德尚矣果趨向在此由是而建功名必為光明俊偉之業若但志在功名而隨世襲俗以就之雖未必無所成立其於道德所歉多矣若或見之

不立而止心于富貴則以倭良登而不免為鄙夫也可不
痛戒之哉 一崇節儉夫士多寒微平生韋衣蔬食亦常
安矣一旦登庸則率多侈靡蓋由於紛華易悅遂爾慕效
故也不思費不能充則將假貸于人債負求償則廉耻必
喪矣是終身之累也故必早見于此極意節儉即衣馬僕
賃之需亦從減省淡薄能甘則官常可保矣此不惟貧士
為善富者能救此道尤善也 一正心術夫士君子立心
行已忠誠端謹明亮正直由是而發於事業皆有實地無
可訾議者上也若夫陰險誦詐讒佞傾陷奸回欺負皆喪
其良心者人物不及知而自知則審矣天地鬼神陰鑒潛

謹何可誣也必慎必戒 一曰勤職業夫開科取士固欲其克艱任事也詩稱夙夜匪懈臣分當然一命以上人各勤職則天下無闕事矣苟受若直怠若事人將以為下才而擯棄之也既服有官而欲自暇自逸斯豈理哉故隨分盡職者忠臣之道也 一敦禮讓夫人齒有長少位有崇卑則所以相處相臨自有定分盡其道者謂之順失其道者謂之逆諸士始進則當自處其順勿抗志陵犯以自蹈其非禮可也 一弘器度夫士君子立身天地間參贊化育并包萬類皆其分內事若主一藝以一命輒自滿假是謂器小易盈更何容受至乃放濫淫虐蔑不敗也必須養

以恢廓大其量而高而在無虛功遠而彌退遜斯為服
聖之訓得君子之道也